



## Halbiere statt regiere

Will aim halt kaine ebbis schänggt,  
het's is daas Joor nur fir d'Helfti glänggt.  
Vo dr Zyt häär hättis kenne basse,  
doch is fäält's e weenig in dr Kasse.  
Drum isch s'Goschdym nit ganz fettig  
und au fir d'Larve gits kai Rettig.  
Mir steen als halbi Pierrot uf dr Gass  
und wenn's räagnet wärde mir halb nass,  
denn au d'Räagebelleryne isch halbiert.  
D'Ladärne isch zer Helfti farbig und laggiert,  
will unser Mooler so vyyl koschtet und kassiert.  
So wie dr Schugger, wo si Auti falsch parkiert,  
dien mir nid blääche. Mir wüsste nid mit waas!  
Opti- oder Phessimischt, s'het nimmi gnueg im Glaas!

Fir drey Dääg gheere alli wo bi uns faasnächtle  
zu de ächte Baselstetter, nur dr Räschde  
vo dr Zyt sin sichr d'Helfti woonhaft ufem Land  
und wäär Zytig liist, waiss gnau s'ligt uf dr Hand,  
dass Rambasse spaare dien bi dr Bildig und Kultur.  
Die maischde hänn im Kopf jetzt s'Bild vom stuure Buur.  
Dä hoggt e Krummi rauchend uf sim Draggtoor  
und maint, si renne jo mit Fyyr dur s'Stadtdoor,  
denn isch doch das scho gnueg Kultur, das länggt.  
Und au dr Stutz vo Basel wänn si nit'mool gschänggt.  
Denn am Änd mecht d'Stadt das Gäld au wiider zruug,  
finanziere gwiss drmit s'Theater, wo si fiidle blutt  
iiber d'Biini seggle, schreiend als wäär Brunschzyt!  
Das mecht kaine gsee, denn do goot d'Kunscht z'wyt.

S'Druurige an dääre Gschicht vo gstrich'ne Gälder,  
s'isch ebbä nid d'Idee vo iirgendem'ne Hinterwädler  
oder gar vo staizytlige riise Deppe.  
Nai, es sin d'Regierigsreet, wo do derhinder stegge!  
An e Styrrerheeig wänn die gar nit dängge,  
schiebe's lieber au no uf d'Studänte,  
das sige alles ainewääg nur laami Änte,  
traage nie nyt bii zer Ländler-Ränte!  
Denn mit Griechisch, Gschicht und Soziologii  
finde die kai Schtell und wärde Arbetsloosi si.  
Drum darf me dert rueig d'Unterstützig striiche!  
Und au s'Drämmlis isch halt nur no fir die Riiche,  
numme die vermeege sich e U-Abo no z'kauffe,  
dr Räschd blibt halt deheim oder soll lauffe

Vom Inhalt häär, do kennt I zwar no wyter raime,  
doch i heer jetzt uf dermit, denn's zaalt's mir kaine!  
Mi miggrig Loon längt nidmol fir e Schluss-Pointe...

[www.luuskaibe.ch](http://www.luuskaibe.ch)

D Ladäerne-Uusstellig uff em Minschterplatz und d Waage- und  
Reggwisyte-Uusstellig bi dr Kasäärne sin vom Määntig znacht  
bis am Mittwuch demoorge! Deert und an de 3 Verkaufsständ in  
dr Stadt ka men au alli Zeedel und Schnitzelbängg, d Blaggede  
und dr Rädabäng kaufe.

BARTH Offsetdrugg, Malzgass 7a, 4052 Basel